



Minggu, 01 Mei 2022

Ogen: Pilemon 1:17-20



Alokenlah ia



Sanga Paulus i bas penjara jumpa ia ras Onesimus. Persoalen si erbahanca Onesimus i penjaraken erkiteken i buatna barang tuanna Pilemon. Palus makeken kesempatan bas penjara guna erberita, nuriken kerna kebenaren kata Dibata. Masa-masa penjara enda me waktu siipakeken guna pertobatan, ngangkai dengen pebagesi kiniteken bas penjara. Onesimus igelari Paulus jadi Erguna. Ia iangkat jadi anak Paulus bas kiniteken. Kenca enggo keru masa ukumenna (ndarat bas penjara nari), ipindoken Paulus maka Pilemon ngaloken ia mulihi bagi Pilemon ngaloken Paulus. Paulus e me senina Pilemon bas Kristus. Semalna adi i bas kerja adat, ranan tegun senina rusur kel sibegi "kune lit la bagi ukur i bas kerja enda entah i bas pengelaken kata tenah kerja la seh entah kurang bagi ukurndu kerina, ersentabi kami enda labo salah kekelengen kami si mada kerja enda tapi enda salah kami nge seninana kurang norosisa kalimbubu." Salah senina na e salahna akapna. Mekatep pe kataken "medes ersenina." Bage me perbahanen Paulus man Onesimus; utangna jadi utang Paulus, perbahanen Pilemon man Onesimus bage ka me perbahanen Pilemon man Paulus. I bas Pilemon ngaloken Onesimus, ialokenna dengen isampatina kap Paulus.

Paulus ngataken man Pilemon aloken Onesimus, lanai terjeng budak tapi lebih asa si e e me senina. Mekatep kal budak kurang iergaken, tenagana ipake tapi upahna la ibere entah la sentudu upah ras tenaga si iberekenna bas erdahin.

Tanggal 01 Mei enda iperingeti sebagai hari budak. Ngingetken kita guna ngergai si erdahin si lit bas sekelewetta. Aloken ia, bereken kai si jadi hakna; ula tahan dengen ula kurangi. Ingetlah bas Dibata seri kita kerina e me tempas Dibata. Anggaplah si erdahin ras kita, entah ras kalak sideban e seninanta. Perdiateken kesejahtranna, rananta mehuli (labo banci ate-ateta). Palasta e me kap kekelengen, bagi Paulus ras Pilemon ngasup ngaloken Onesimus, kita pe ngasup ngaloken kalak sideban (si erdahin sebagai buruh) alu dem kekelengen.

 *Cidahken kehamaten ras kekelengen nandangni kalak si erdahin*